

Mas impuesto riba banco lo stagna economia y aumenta inflacion



ORANJESTAD – Asociacion di Bankeronan di Aruba (ABA) ta observa cu preocupacion cu e introduccion di impuestonan nobo riba sector bancario lo produci un “over transaction”.

Sr. Javier Wolter di CMB y miembro di Asociacion di Bankeronan di Aruba (ABA) ta splica cu “over transaction” kiermen cu pa cualkier transaccion cu bo lo haci, nan ta bay cobra bo impuesto. E ta considera esaki mescos cu un Bbo of un Bazv cu comercio tampoco lo por absolve stagnando nos economia y causando impacto social.

El a laga sa cu impuestonan introduci riba producto of servicio, e ta crea inflacion. Sr. Wolter a señala cu e suma

di 8.8 miyon cu Banco Central lo haya di entrada nobo aki riba benta di divisa lo sali entre otro di e personanan cu mester di dollar pa bay biaha di vakantie.

“Tur cos ta bay subi, construccin, cas ta bay subi pasobra cu bo ta importa cualkier cos di cas bo tin cu paga den dollar y dollar ta bay haya un change mas halto...tur cos ta bay subi”, el a bisa.

Impacto economico

Encuanto e parti di economia el a reitera cu e tipo di medida cu ta wordo impone riba banconan ta bay stagna nos economia. El a pone como e chemplo cu e hendenan ta bay bek cu placa cash pa compra nan auto na Merca. Nan no ta bay via banco pa evita pago fee di transaccion pa compra di divisa, y nan lo

opta di compra dollar poco-poco den casino of otro establecimiento. E ta mira cu nos lo bin bek na decada di año 70 y 80, locual ta nifica cu nos ta bay atras. “Nos no kier bay bek mas. E ta gewoon para e desarojo completo”, el a bisa. E preocupacion aki ABA a yega di vocifera na gobierno, na e minister concerni y na Banco Central aña pasa.

Pagado di belasting

Sr. Wolter no ta haya husto cu un sector chikito manera e sector bancario mester carga tanto belasting. El a indica cu sector bancario ta e pagado mas grandi directo y indirectamente di belasting na Aruba. Igualmente el a laga sa cu via nan trahadonan cu ta alrededor di 1000 trahado, banconan ta paga tur belasting. Ademá di esey, banco-

nan ta procesa tur e transaccionnan di dolarisacion di florin unda nan tambe ta contribui na caha di gobierno. “Tur esaki ta genera hopi entrada pa gobierno”, el a bisa.

Ademas un “financial transfer tax” cu lo wordo introduci na mita di año di 1%, lo crea otro impacto socio-economico. Sr. Wolter a bisa cu e peso aki adicional lo crea hopi consecucionan. E consecuencia principal ta cu hopi hende lo trata di evita di paga e transaccion bancario. Esaki lo por trece cu ne cu hopi hende lo bay bek den e sistema di antes di paga cash y “pone placa bou di corchon”. Esaki lo trece un stagnacion riba nos economia ya cu banco no lo tin placa pa fia pa sigui stimula economia pa comerciante sigui importa y consumido sigui compra. □